

小重山房詩詞全集

詩船詩續卷一

華亭 張祥河 元卿

青浦孔宅謁 至聖衣冠墓和邢淳甫學

使韻

聖裔分吳郡神祠儼魯宮化彰 天藻裏氣接
岱雲東環壁留前代儀型緬上公會稽初避燹
長史又羈鴻卜宅難基始明禋克慮終浦沿洙
水派壇引舞雩風大葬衣冠古佳城竹木葱從
周彝器在輔漢世家崇地寶淳熙現儒書至正

隆元至正初式閭如闕里望道比高嵩匹練江

潮白偏隅海日紅梅花園的樂宅在海隅鄉慧日寺側數里皆

梅楷樹想冥蒙荏苒知津客滄涼過郭童清時

仁帝幸下邑 蹕塗通 灑翰瞻 龍御飛

翬飭雉工烝嘗千載永碑碣 四朝豐翼翼居

真近栖栖數不窮泖峯聯一脈日月轉雙瞳節

使來修謁諸生議擴充授經高密意藏壁濟南

功絲竹聲何寂門墻澤本洪緇帷林谷外法物

畫圖中展墓蒿萊闕登堂禮樂融爭傳虹彩下

肅聽鼓音逢木鼎銘戈立山尊狀亞弓由拳珍

瘞玉曲阜紀

頌銅

乾隆朝鼎亞尊等

頌周范銅器木

廟

孔長律金同鑄宏文石待礪利看師教普害

遠異端攻執鬯還交勉羞蘋早潔衷贊成賢令

尹

謂孔邑尊昭顯

衍緒澈

堯聰

望雲山莊落成

先公祠宇在山根更向山南借一墩慙愧百年

繩武意繡巖紅岫盡

天恩

純廟賜額繡巖紅岫

隔溪地脈引諸山東亘龍身得水環隨分亭臺

成小築端端赤壁玉峯間

松竹連雲接太虛全山橫翠畫屏舒深秋黃葉
深冬雪都向窗前伴著書

花下平橋界碧灣矮籬水上出螺鬟登高有例
重陽節好奉慈輿一看山

己亥中元節集同人山莊和竹初弟韻

生與閒鷗野鷺盟水邊小築數峯橫借雲原踐
蘭朋約賞月還期桂序更酒榼攜來涼蔭滿荷
鐙散處夜潮平經營多出天隨手

謂陸素莽翻累留

山爲送迎

潮生日再集山莊

桂花香裏踐前盟吟讌重招數舸橫種樹已教
鴉護鍾守籬尙待鶴支更十峯此日留孫稷五
嶽何年了向平最好鄉情容脫畧大衫麤笠隔
溪迎

牛耳誰堪主此盟多情詩句出縱橫坐中白髮
三千數醉裏花枝一再更黃歇潮聲應自壯富
春畫境豈全平只遲平聲澆酒壺盧客紅到山茱

跣石迎

小枚馳寄四詩有儂愛仙人
灑酒石幾時買得種壺盧句

過王氏含清堂

當日尙書主夏盟含清回首片雲橫史才一代
還相病山色千秋自不更歷歷巖花涼雨黯荒
荒澗樹暮烟平吾家雲塢同搖落怕見祠前老
鶴迎

葉桐君園桂未開詩以催之

叢桂留人締酒盟小亭著處影交橫山香帽待
風前落迦葉衣從定後更乾蜨貼簾秋日燥蠕

蟲棲稻晚雲平何當一雨蘇芳彙村叟園公次第迎

山莊與陸素菴及趙允明陳嘉軒兩壻校射

東山序雁憶前盟射徑新開槿竹橫涼吹撲塵
鵬乍下朝暎散暈鵲頻更車輪要在心精結盆
水難爲手法平自笑井儀還未習何勞飛鳥隔
溪迎

小春望日集同人山莊看紅葉和顧荃士

韻

松喬未盡施斤斧黛色橫空秀千古細林天馬
從東來衆山如賓此爲主宛披子久富春卷雲
影天光豁眉宇王家東峯我西崦修史名流昔
萃處嘗聞兩地煥丹堊豈意百年歎枯腐繡巖
紅岫宸翰褒世澤恩光天尺五黃雲似鄧
近隔谿紅樹如屏喜當戶浚渠半畝剛栽花結
屋三閒更聽雨望中薜蘿互纓帶坐上鳩鵲相
媚嫵暖思徧野彩蜨飛寒想漫空玉龍舞讓山

僅可著短籬跨水多應置涼廡小溪拏舟酒頻
載馴鶴守門客母拒計從賞菊摘夜蟾亦越囊
萸踏香土及茲冷楓紅滿山霜後天高七絃撫
布帆歷歷林外馳翦笠端端岸旁佇集成主客
十九人中有征袍兼出祖

謂竹泉北行

一千六

十有二歲白髮居多圖可補比鄰鵝鴨皆朱陳
兩曲桑麻亦韋杜香山九老渺莫追香光大逸
倘相許虎頭癡絕醉不辭醉後詩成快先覩隨
心出處剡溪棹抱愧滄洲灌夫圍烟霞眼底且

後約負鋪從君訂禾譜

荃士疊韻見示有猿鶴空山或予許句會
重餞雷竹泉比部北上廣其意爲勸行之

章

散材畏見搜林斧

用東坡句

疊韻詩來入奇古挑鐙

累我作答難多愧山中松菊主君意蕭閒乃性
天君言豁爽其氣宇縱隨猿鶴締素交何遽衡
茅甘伏處赤心補敝兼救偏白眼吞腥與啄腐
讀書致用一當百奏最循良十得五謫仙曩日

下蓬島山石清聲起編戶庭前草滿居士帶縣
裏花飛社公雨歸來葺城聽足音愛向烟巒寫
眉嫵坦然山簡接羅倒清絕孟郊獨速舞三灣
水轉繞菜涇十笏堂開卽梁廡君所居菜花涇
三轉灣卽當日
甥館殿前楊柳風尙翩江上芙蓉霜早拒詰朝送
客催驪歌卻望修門話塵土天街禁烟令肅
清寰海瘡痍手摩撫外夷烏艦蠻觸窮中使巖
疆節麾佇刑曹觀政拭劒雷行路先期著鞭祖
下走不爲明聖棄圖報曾無壤流補秋風昨

豈緣薤蘆舊壑今何眷蘭杜慈輿迎養我所期
遠志出山君倘許將詩勸行前馬驅將詩比才
豫章觀論齒剛宜艾服官棲心未許學爲圃親
民第一建功績歸續山陰傅家譜

荃士重來余齋菊罌思下復成一篇

畫家皴法如擘斧列岫窗中黛痕古籬菊延爲
坐上賓材醪迭作城西主尖團不用作詩換攜
榼人來隔衡宇謂雪香移春有檻此規仿避風
無臺入室處豈伊侔色愛璀璨畧似選言去陳

腐拂楹雲布兼星羅點筆攢三又聚五養花截
筩儼挈瓶護花懸鈴常闔戶裏頭一夕湛井華
脫腳今年苦秋雨我爲殘英特洗妝君曰側枝
更生嫵同是矜憐爨後才不覺婆娑醉中舞眷
汝根塵本瓦盆祝汝影形尙堂廡自心無罣亦
無礙人事何迎亦何拒花聞此言開笑顏花悅
此禪皈淨土灑落原宜片月邀盤桓何啻孤松
撫翠慰香外酒頻仍屈戌鐙前客延佇亭亭綠
意借竹卿采采騷辭伴蘭祖相從詎有後時嗟

此會端如九日補何哉強韻紙爭壓澹到忘言
口應杜南山縮本與目謀美人卷簾或心許泉
明當亦好色者否則東籬可無覩伶僇未必妬
青娥散傲綠何棲老圃葩經比體君領之乘興
還搜石湖譜

辰山神龕館同何古心作

居廬百不與舊友常追攀祠墓峯泐間扁舟相
往還辰山一再至愛此青孱顏丹井緬仙蹟龕
館空塵寰君有濟勝具詩筆尤蕭閒逢山必窮

巔疾足無阻艱登高及莧節申約來禪關
前攀蟹螯簾外圍螺鬟黃花菩薩面綠水琵琶灣
清酌一夕韻世慮同時刪歸途曲磴明弦月懸
松間

馮少眉梅花卷

縹緲花香雪後春花巔端合著斯人明蝓蝕墨
八分體大螭騎風七尺身煮石前緣琴幾疊佩
壺近約酒重輪箭雪我愧虛新築目極橫枝柳
水濱

楊閑菴見示先大夫和楊廉夫寒食詩

垂虹亭畔一舟還
鐵笛重吹意本閒
灑淚悽逢寒食雨
題詩怕說洞庭山
珍同柏櫃藏應久
集有松陵和敢慳
我正居廬檢遺墨
可堪回首翠微間

柳如是畫蘭

行吟澤畔竟如何
春草春風閱幾多
閨閣才名原有數
一時愁煞顧橫波

陳芝楣中丞海塘竣工紀事和韻

如鏡波恬島嶼青迎騶歌頌徧滄溟海疆喜見
衣裳會鹵地重修耒耜經寶壤移圖來漚濱淮
防分力到塘丁寶山海塘先成此請看倬漢
天章煥出曙雲霞爲列屏

建議先期羽奏馳勸民屢荷大官慈但希計畝

趨公意不礙輸租速漕時衣食探原真鄭白圭

璋協業本皋伊

謂制府陶公

卽今海溼酬神貺路滿

香花雨滿旗

礪築施工精益精玲瓏舊壩憶江城黿鼉不礙

膠泥守鐵石真能駭浪擎六柱鼇磯憑意匠萬
家魚夢兆心耕

中丞嘗夢異人授耕心二字

年年減汐分潮

處會見纖蘿汊尾生

旋節葺城一過臨江天出示海天吟非常誠恐
黎民懼已定還勞善後心紀盛琳琅垂績久酬
庸渤海比恩深我鄉保障叨枌蔭同鼓成連
水上琴

和姚春木與林少穆制府黃州唱和韻

一駐高帆一卸帆和詩還往日褰襜戴公野服

真成適羊叔軍容不覺嚴醜水江頭馴駭鯉禁
烟燈下斫妖蟾遙知馬上徵文簿賓館端應禮
穉廉

山莊曉起寄古心

老氏安神此亦家海天萍實豁窗紗將舒復斂
山頭霧已落還開汊尾花種樹栽成皆事業換
鵝游戲亦生涯芙蓉招得聯吟者乘興時來上
釣槎

爲牛鏡堂方伯題錢舜舉寫生長卷

咄哉飛潛動植各逞態是何筆也采欲飛懶翁

舜舉自號
習懶翁

興到便不懶目無十丈絹素一筆揮

人間丹粉在妍靜窮極諸妙能通微直須花心
摘取宿露下吮豪調色瞳子迎朝暉吳興八俊
有數才誰得趙昌之傳衣七百年來漬塵雨重
新籤軸歸武威今歡古歡一展對時晴快雪香
霏霏出之畫手實神品入之君心都化機吾論
物理畫理或者其庶幾

陳雨峯軍門湘江洗馬圖

大旗風靜江水春玉花照耀湘江濱奚官洗刷
好鬣鬣誰與騎坐真天人將軍曩官鎮篳鎮獲
此良材雙耳峻威鳳來窺細柳營貪狼都懾梅
花陣一身一馬十年隨到處成功不自奇兵氣
銀河全盪滌癥痕汗血尙淋漓粵西晉節 褒
英武吳會移幢攀部伍畫鷁牙檣皆水程錦鞶
繡鐙歸開府謂梁芷鄰中丞將軍別馬情不禁別情深
比江水深安得曹霸作畫杜甫引一寫馬骨與
馬心

庚子元日拜經圖

雲物紛綸節物新
幹金枝水拜年神
揲來蓍草義爻吉
探到梅華孔宅春
玉燭調和逢聖世
都京鼓吹有詞臣
畫師頗識崇儒意
經術敷宣正及辰

粉荔迎年一度新
年前瑞雪玉精神
樞衣畧效臧榮緒
展卷多慙井大春
慈閣青燈寒幔教

講筵黃日捧函臣

曩直樞廷兩次恭繕御經筵諭旨先期進呈

臨京

華舊社尊彝列曾預羣公禮誕辰

八月二十七日京師士夫

祝至聖誕辰行三獻
禮以甲科前後爲序

喜錢梅溪丈過訪

太平垂釣尙湖春人訝王孫是古人石室菟裘
成大隱之呆鳥篆補先秦喜來泖水爭迎櫺除
卻梅華可寫真出袖商山神坐字白頭園綺或
前身

仲春五日青浦道中同人謁孔宅竝探慧
日寺梅花

已看選石向河澹丹堊今年廟貌新客舫路經

三折水僧廬花及二分春風高鴉陣盤空迅日
暖鷗羣出浴馴第一征程戀鄉井况余更是遠
游人

三月十八日 陞見紀 恩

御鑪香裏拂征袍中使宣名 九陞高遠道重

來承母命康年難得荷

天褒

垂詢臣母年歲
奏明七十有九

仰荷

恩褒

宦情烏鳥瞻雲切歲事東南 問

雨勞尤愧簪豪徹

宸聽拱辰八載舊樞曹

拱辰

樓在軍
機直廬

四月初七日奉 命仍授豫臬初八日

召見齋宮初九日 召見乾清宮西暖閣

賜克食 諭卽赴任恭紀

宣召旬餘復對揚被 恩稠疊益慚惶 齋宮

禮肅 天顏霽温室香濃 訓語長勅法中州

宜樹表得官舊地等還鄉馳書先慰慈親望準

奉安輿八月涼

邀顧含象入幕

太華雲高匹馬輕攜詩來就菊花盟大河聽雨

將塵洗小院栽花使眼明
石墨香多雙壁合以君
香光岳陽樓江楓句好萬山迎君有江楓不從
記石墨見遺今商畧無留牘隔屋弦詩一樣清

題畫八首

廣陵金帶

四相簪花只四枝
廣陵最好餞春時
圍腰金帶尋常事
却訝當年選客奇

汾陽晉爵

安史除奸異姓王
世傳富壽郭汾陽
將門偏有

兒孫福聽演旗亭笏滿床

和羹詩讖

沂公偶爾句新裁且向百花頭上開若論鹽梅
調鼎法豈容一味議和來

周子愛蓮

萬葉生香遠益清圖成太極數花明起予却問
誰同愛除是從游得二程

緱嶺吹笙

月高緱嶺彩雲還響竹叅差手不閒安得浮邱

來接引洛濱攜袂上嵩山

金蓮歸院

詞臣寵遇得何修
撤炬歸來報曉籌
一鎮夷門經五歲
感恩詩在望京樓

松下修真

一院松風脫帽涼
隱居雅稱草衣黃
須眉合是陶宏景
晚歲青瞳漸漸方

嬾殘煨芋

佛鑪無性火猶溫
衡嶽鐘沈聽叩門
忝得其中

禪悅否十年宰相勿多言

顧含象貽詩謝鹿肉和韻

一味真如腋一狐塞山風味在茲乎點椒亟欲
徵肴將勞酒還須配酪奴殘雪園林應共念除
年牙齒更宜酥今宵相約來揮麈手破冰魚勝
玉鱸

歲除三祀詩和錢心壺院長

門

萬家爆竹聲中州得豐歲換符拜左樞新桃雪

言州言系卷一
天霽從大夫之後三祀行族厲月令舉孟秋茶
壘此年例金鎗與龍旗采畫寶瑰麗 盛世治
大同門戶絕附離么麼竟排閭沸議在海隘巖
壘有管鑰誰與司啟閉虎門粵咽喉毋爲逆夷
睨

井

井星上熊熊井田下庚庚易義養不窮王政於
以行吾齋居其眉玉虎牽銀鬚吏退靜無事轆
轤時有聲歲除祀童子果餌席地呈一八與四

八界字飛泉清多汲不爲損少汲亦不盈亮哉
李尤銘執憲何邪傾

馬祖

客窗齟草聲長疑夜風雨入直事鞭鞅八載七
隨扈得詩在馬上初試署輒俯豪游醫無閭直
抵黃龍府我馬真稱意棧豆偕辛苦茲來綜驛
傳羽書正旁午羸軀飭使肥缺額飭使補朝吟
吉戊章旣伯卽馬祖馬步勿爲害禱爾供酒脯
坡公紫雲硯爲陳九香題

紫潭生紫雲踏雲刀可割坡公精靈七百年一
片琳腴目光奪公書用墨最豐秀論筆宣城喜
諸葛晚年揮灑更入神海上風濤壯且濶承天
寺中記昔游雲盡水窮一瓶鉢公於是歲四十
八洗硯有泉古菩薩黃州好句後賢讀手寫公
詩腕幾脫異代懷民得石交竹柏陰斜玉蜍活
元豐六年承天寺
附游者張懷民

有懷總宜船

吾家有牽船沿襲西湖名春水潑衣綠晶簾何

盈盈三年息影居愛聽幽鳥鳴鼠姑花開時熟
客無送迎入座多老壽須眉相與清蔬荀可薦
酒一甕兩夕傾好事過後思歸夢常茸城豈云
不繫舟布帆有餘情

齋前插籬補樹

壺天十二峯高者僅三尺羅列如兒孫可呼使
見客亞闌在陂陀旁有地可畫編籬爲曲徑種
樹補其隙春分撒花子新雨酥土脈生意當滿
前朝朝看甲坼豈無公暇時毋爲塵境窄風日

得清美詩來亦閒適

上巳日雪

濃陰無恠浹辰遮遮住春山滿洞霞官閣梅遲
開口笑市樓酒貴盡情賒穿枝可現光明佛飛
絮難言穩重花只訝却寒簾未辦采蘭風裏鬪
尖叉

吾齋

吾齋如窖復如船窗格多明小有天亂石扶花
真建節短垣插柳欲開邊疏疏鴉點橫茲畫戢

戢魚苗在藻蕭收拾殘梅作茶具他時梅雨好
同煎

青竹屏風歌爲顧含象作

酒豪一盞無古今詩豪一室小天地世間何物
可徇俗縛竹爲屏得深意君喜竹屏在坐右人
詫竹籬在屋中我眉散仙遊洛下得毋將鶴樓
樊籠少年引盃長看劍老猶吐氣萬丈虹醉來
兀坐有奇夢搖炫銀海春迷濛巴雲峽雨境不
隔多目神至皆方瞳俗眼那識造化工大千世

界白間紅插花嵌空真玲瓏曷弗再挂三百青
竹簫

山雀

山雀好毛羽穿林如有情
盆池來小立喜照尺波清

展稊

展稊端宜洛水邊鄉人釀酒祀三賢

吳太伯季札子游子

洛陽春送鼠姑去欲向商城求杜鵑

提壺

提壺爲甚忙一院衆芬芳小朶開金盞柔枝綴
米囊更無蟲絡架時有蝶過牆領得清冷趣壺
天自在香

盆魚

養魚爲養日長日對清漪魚擾水無覺水添魚
勿辭天光簾罅入波影硯凹移不是池中物何
緣首尾垂

爲查查山題其令祖伯墅先生畫蘭竹冊
祝融不忍抹名蹟留此甘葉多叢殘春窻風雨

忽滿几墨色潑眼青彌漫專家六法有心得前
輩根氣何盤盤筆之所之百卉活豈止寄託在
竹蘭卽如論蘭先畫葉兼論畫竹先立竿縱橫
逆順運腕一枝不枯槁葉不寒真傳要言告令
子清氣得者乾坤難及茲文孫捧遺冊題字往
往徵騷壇我參畫學亦廿載一葉一枝無所安
服公神明不矜伐反覆循繹忘朝餐

題洪幼懷孝廉齊雲山人詩稿

腹有名心讀史雄一鷗洒爲古人中雲生齊嶺

多奇句雪滿梁園着寓公樂府動傳真血性卷
施知係舊家風尊甫稱存先生著卷囊沙蠶絕米脂
手莫問河陽宋故宮

廖裴舟書來誇今歲客館牡丹之盛

菖湖春事憶吾鄉濟上重開舊草堂隨處栽花
真聖手就中著意是天香萬千紅紫朝金谷十
五容顏聘洛陽見說風前裙屐盛有誰綵筆賀
姚黃

爲陳瑤農水部題其六世祖迺錫先生遺

詩

先生名宏範湖南長沙諸生 國初洪經
畧嘗倚以招撫黃州各寨先生志在靖亂
事訖洪以偏鎮副將薦不受歸長沙所存
手書詩四十二首皆五律高簡有致

黃州招撫濟時賢知遇南安豈偶然借箸功成

長揖去湖湘好月盡情圓

好月盡情圓
公卷中句

東祝堂高萬慮空米書杜律儲堪雄長沙好補
遺民傳亮節英風五字中

謝高樺庵司馬餽藕

走馬黑坳廿餘里小吏擎得荷花歸數花離披
兼數葉酒罈插花見者稀葉乾洗碧可當盞花
殘脫黃時染衣迎涼正欲召佳客玉盤餽藕雪
一圍南河司馬吾畫友玲瓏胷次皆珠璣安得
烏雲天際潑水墨嚼此雨草一霎消炎威師曠曰歲
欲雨雨草生
雨草謂藕也

苦熱偶成屬李白樓繪詩意於橫卷儼在
清涼亭榭也

坐此酷暑中每想清涼境安得水心亭明漪浸
人影一面竹千墩一面荷萬頃飛瀑挂西峯蒼
松羅東嶺我友六七人衫笠亦修整詩思濯楊
柳酒香入藻荇龍湫儼卧遊栽雪助明靚大造
真愛我貺此無上景世間炎熱胷到此亦可靜
三更涼月升返棹老漁請

望雨疊前韻

雨雲被風驅炎赫尙四境責躬多有失民瘼在
衾影三壇步禱虔晚涼僅食頃泉源近取水不

隔太行嶺大府親製文壇儀重修整南關閉離
火坎缶挹水苻朝披繁露篇神龍寫華覲潑墨
具鱗爪頓起北風景頌畫龍一燈懸之壇中辰日稱雨師
羣動息以靜大田好年歲官爲斯民請

喜雨復疊前韻

天心本仁愛赤地憫豫境朶雲忽然來電掣金
蛇影殷雷旋震奮甘雨成俄頃有如扶桑游陡
上峨嵋嶺獨室香載焚中夜冠復整庭空得水
鑒竹柏皆藻苻斷煙接曉涼斜月漏妝靚詰朝

報神貺出見村落景澤下四寸強含青一犁靜
既優既霑足所願不敢請

僑寓宋氏園亭

陵谷遷變水上堂解職得此藏園藏汴民露處
手餽飪我亦何心見林壑北關小綴一角秋廊
庶藍本從揚州圖書雞犬身外物何啻浮寄張
融舟英雄拊歎肉生髀時也艱難從大體萬馬
奔騰襟袖中夜寒鞞鞞黃樓洗露臺兀立聽河
聲檣鐙歷亂城頭明長庚作作芒未斂何日挂

纜霜天清

葉素盦孝廉有招隱西溪之意交蘆庵本
爲吾家別墅擬得而新之爲小菴裴兼訂
剡溪過棹也

交蘆如雪開溪堂思翁眉公舊蹟藏
調飢讀書蒸餽飪前賢胷中萬邱壑
魚梁問價春復秋鉅鉞遭逢賀柳州
百年故物儻還我龍涎香識倪迂
舟田頭秧馬看拊髀勞酒爲予勤
四體花事從教桂隱留詩腸更借
江流洗六橋西去聽溪

聲飛棹能來趁月明
舊水新人同一醉此情此
景有餘清

外孫趙增瑛重校

詩舲詩續卷二

華亭 張祥河 元卿

明紀善邱公父子忠孝詩

順治朝 皇師既定江南唐王聿鍵據閩
中紀善邱箴凡以潛邸之舊從王迨閩帥
鄭芝龍迎降黃道周不屈死箴凡走山寺
自經子明之聞變赴閩負骨歸葬湖州終
其身不仕

唐藩舊學數邱公閩嶠搆持半壁空國士相從

黃閣老驕兵誤煞鄭元戎千秋此節匡山後萬
里歸骸野寺中有子居廬采薇蕨興朝容爾
著高風

壬寅季春自宋門開渠十一里至惠濟河
洩城中積潦工竣與鄒鍾泉同年驗收志
喜

水門洞外浚長渠惠濟河頭作尾間汴口何時
恢舊略豈徒放閘救沮洳

今朝坦坦平平路昨歲洪洪汨汨流賸有溝形

沙沒髀牽來岸上幾圓舟

防河前代錫元圭少保威靈鎮鐵犀萬頃奔濤
襟袖裏是誰貽患補南隄

徒衆懽呼畚鍤輕使君擘畫繫全城半年警枕
城頭宿快意今朝並轡行

讀劉松嵐觀察拜武虛谷先生墓詩書後
偃師武先生宰博山有聲當時和相風聞
妄人言山東反賊王倫未定死密使番役
四出蹤跡於是副頭目杜成德等十一人

橫行州縣入博山境手鐵尺飲博莫敢誰
何先生悉執而杖之上官以任性劾奏不
直書其事民乞留嘉慶四年徵召先以疾
卒先生勇於著述經讀考異羣經義證三
禮義證金石跋讀史金石集目錢譜授堂
詩文集皆其所著也朱文正公銘其墓

金石交中德不孤末流氣節要人扶吾鄉劍叟

同千古摩袖曾爲捋虎鬚

謂曹劍亭先生

可惜嘉初徵召遲槃陀空結授堂知 國門先

見儒林傳又讀劉公拜墓詩

贈王講泉

玉奴解勸玉偏提
趁著花香擘蟹臍
九日秋教彭澤占
六旬眉與孟光齊
懷中龍虎風前筆
夢裏琴箏雨後溪
儂少於君兩周歲
何年鶴髮並山棲

月夜巡城

開濠王衛城徒衆
萬千盈新月照殘
堞連宵爲此行
流星鐙接影裂竹
礮連聲漸見民安
堵茶

帘柳外輕

藏園卽事

恒河四面起塵沙不卷重簾畧可遮
亭角何來數枝雪中元節看玉蘭花

更無高樹曳蟬聲彝頂秋陰瘦削成
最喜昏黃掠蝙蝠露臺蛟蛎一時清

萬蓮花裏夢江湖妙法經中見故吾
博得文殊大歡喜端應解髻與明珠

晚餐池側一亭安剩暑亭中入坐難
挽取涓涓

雙井水洗餘碧盞洗紅闌

良嶽遺石向置相國寺昨歲守城用以塞
橫流今土人輦送葵山書院史叔平院長
疊爲小峯索詩記事

最好橫雲是我鄉夢中翠繞舊池塘九峯莫悵
花晨隔一品今聞露夜香壘影重重迷古剎皴
痕兀兀失高岡鰲身曾作狂瀾障纔洗奇文到
講堂

姜小枚見寄四詩次韻奉懷

瀕海妖氛已兩年吳淞南望此心懸火中軍有

招魂慘

謂陳軍門化成

亂後人思撫字賢一舸大都匏

葉寄九秋無復菊花鮮新還鄉井輕租稅應感

膽黃在眼前

蠲租十分之三

清嚴古佛守松關肯藉卬枝策老孱白石歌詞

真協律壺盧著述可藏山荒林社誼玉申後廢

寺潮音泐澱還傳說樓船量水去正憐淺渚碧

潏潏

防河得失衆咸知再上繁臺愧寸施畚鍤經營

成勿亟近修汴城工已及半瓶鼻挹注有如斯吟松獨契
蒼髯叟鬪茗誰延苦口師滿地瘡痍今漸定夢
中猶警羽書馳

華髮何知歲月侵養生誰問坎離金高朋雪壯
梁園色亂石雲留良嶽陰雁帛三秋情惘惘苑
羹千里味深深何郎近有登嵩約爲辦藍輿候
翠岑何古心有登嵩之興未到爲佇

雪霽

雪後日色晶猶如雨後月庭階竹樹陰新沐散

頭髮

開戶萬梨花夜霜作樹挂安得小髯弓粉本天然畫

鄒鍾泉同年出示先世黎眉先生吉十梅圖卽用卷中原韻

畫師風骨本珊珊然碧社山荒硯有田一夕煙雲
摹秘閣全家輦悅綜遙年沈沈紙色消蟬外縷
縷茶香在鶴前清宴亭成晴雪裏好煨芋火擁
袍眠鍾泉新構清宴亭於開封府署

偶成

燭炮香殘霜滿天
簿書堆裏檢詩篇
山妻笑我宵吟苦
還是篝鐙未第年

和心壺先生雪獅子歌

是鬚者師煌孽避聚雪何如聚沙戲
北風一夜吼林角
膝六由來偕巽二入門蹲踞腹地堅
誰爲引進旋馬旋石崩木折勢搏象
只怕火攻卓臍然猙獰似此失塵素
雞狗皆驚况童孺文殊之山到未曾
章壽洞中喫茶去

癸卯正月四日微雪

五更細雨朝集霰淅瀝半餉寂不譁博山鑪溫
無性火氤氲一氣重簾遮呼童亟起埽松徑凍
鵲坐穩枝叉丫籬邊枯菊綴小白宛似木棉纔
吐花

春朝試筆

東郊雪融作春水班春使者旗鼓譁二月修城
徒眾集三月修隄土石遮今年會見麥薈熟太
歲黃衣雙髻丫老牛喫取一鞭打青笠牧童斜

插花

何兩人少農以天然梅花硯見寄舊爲初
頤園尙書物少農得之十三年余書往欲
之竟以輟贈喜何如也

天然硯有梅花影得未曾皆歎化工仙子妝成
明鏡裏喜神笑入紫雲中虬枝好灑金壺汁鳳
咮憑吹玉笛風居士不知搖落感自紆真手出
靈空

向背稀稠若可尋欲從點筆問苔岑頤園花木

懷先輩東閣琴尊見素心無底寒香君復寫就
中畫理仲圭深十三年後重投贈磨穴書孱愧
不禁

和何古心汴梁雜詩原韻

河決懷前度洪流市四城及茲蛟鱷徙纔息雁
鴻聲市湊人烟密倉空米價平女牆中夜月警
枕不勝情

曩者防河宿
城頭九閩月

嶽色空梁苑河聲夢禹門荒荒裴相宅寂寂孔
融尊北壘惟官渡南津少故園不堪風捲處沙

磧變林原

望望少林寺誰忝面壁功山邱秋草外金石碧
虛中鸞水雙嶠接龍門四闕通詩清呈玉女請
爾一登嵩

夜話梅花屋寒香正耐聞感時看東海避地作
閒雲酒向樊樓貰峯從良嶽分留人真一笑不
藉小山文

鍾泉同年招集清晏亭小山成障就中日
冠峯尤爲奇勝

亭臺新見小山成列岫都沿良嶽名觀政歐寬
與包猛歐公包公祠卽在署左關心海晏並河清黃流手
障方歸壑石丈功高亦衛城却訝汴宮多故物
天留奇品屬先生

齋中木桃數株移種小石林間

窗中初旭照花明窗外春風敞午晴貧女釵環
宜出閣小山荼火乍移營枝枝葛井燒丹染葉
葉隋宮翦綵成爲語詩人同點筆石交投報有
餘情

題錢香樹先生柬其門人王白齋司農典

試江南詩卷後卽步原韻

傳衣傳鉢有師資詩興江山一助之穀皮得意
疾書後想見郵筒走馬時

文心道味此中忝佳話科場青出藍二老東南

係

天眷

兼謂沈歸愚先生

老錢老健筆無慙

御賜老錢筆

老健句

九精照耀宿羅罍前度高軒在攝峯

立之侍郎典江南試

卽在前科省親先生於棲霞山

喬梓圖從

天府賜先生真似

後凋松

御賜
喬梓圖

嘉石庭四首

神物不終晦星精榮以繁爲迎高士駕先毀館
人垣沙白土成磧林紅花作樊天隨能位置一
任手騰翮翮疊石出陸
素庵手

一髮成佳構玲瓏入望偏嬌娥垂髻立醉士擁
袍眠丁固松生腹崔光鶴上肩不應嘲杜撰此
卽畫中禪

嘉石題名乍庭除草自春在官看挂笏何術可

平民招手雲環牖投懷月趁人交遊曾磊落多
半定中身

仄徑更無際方壺別有天諸生盤谷賞太守鬱

林賢

山長史叔平太守鄒鍾泉近苦列石齋頭

二子真同癖中年未

放顛相邀具袍笏一拜一陶然

汴城自前歲河決後水過沙停風起輒簸

揚滿城幾於俾晝作夜三月十七日風甚

偶書

八窗風撼漸無光一餉駒塵接混茫大塊文心

如有鬱恒河沙數本難量分曹揮塵開筵緩卓
午燒鐙判牘忙聽到過簫聲不歇環城猶夢濁
流黃

風過後作

分教花事怱怱過一斗塵封石骨青井上亟呼
新汲水當窗洗出小瓏玲

和古心蘇門觀百門泉

君初來汴日與君道百泉我未至泉上今君乃
先焉蘇門誰更發長嘯但聽泉聲鳴萬竅地不

愛寶珍珠噴地肺兩字題何妙承提地肺二字見肺小波
大波相鮮新風清月白仙之人詩筆洗盡瀛洲
塵間君斯遊君曰善笑我何時機事遣酌客鷺
黃饌白鯽

又和古心曉坐白露園韻

省門春色半塵土安得洗耳流泉聲夏峯寓公
此遊憩川上易見心源清蒹葭一方照儀表鷗
鷺而外無凡鳥中夜神仙常往來五更何事雞
催曉

書家三文敏公象

松雪老人

書家豈把文章掩草隸分行篆籀真公是前身
李北海閨中還見衛夫人

英英飛白石生濤畫竹還傳金錯刀占盡吳興
風物美肯容墨妙一亭高

香光居士

平生志欲跨鷗波晚歲禪心養太和金仗好花
助姿態流傳真墨後堂多

海內推尊畫禪室句麗人尙爲籠紗柳東六逸
歸吾筭勝事應知井里誇前歲在松郡喜得柳
東六逸圖眉公與居
士對坐麻衣和
尙置巖壑間

先公天瓶主人

綸音一代追義獻十載南齋侍上皇畫被裁

蕉真手在玉虹樓接玉煙堂

宿雲塢畔草新除

近葺橫山祠宇

先後榕城走使車

於公

雍正甲辰祥河於道光戊子先後典福建鄉試相距百有五年

慙媿肇窠全力

赴被人呼作本家書

夜飲寄心壺院長

笑煞三更走蠹魚書能引睡更澆書醉螯似戟
張還健乾筍如巾折不舒隨意杯盤真味得舉
頭參井惡氛除寄詩舊日黃門客於世無求樂
有餘

詠庭中襍花

褪紅衫與紫霞裳購得天香自洛陽別有牡丹
冒名者當歸花縮小荷囊

飛沙黃我竹三竿墻下戎葵綠未乾乞得黑垆

紅藕好小荷葉當古錢看

白丁香苗露盈梢兩樹榆仙碧葉交隔院烏鴉
無賴甚柔枝亂折入新巢

冰梅紋拓八窗涼借樹借山還借光青玻璃中
盡苔石綠玻璃外盡垂楊

哭循齋弟

俄傳惡耗淚淋浪三月罡風鴈斷行臨去音容
新鞋注再來魂夢舊河梁兒能視舍君應慰
母尚緘衣我更傷一過西廳一悽絕可堪官燭

照空床

洪稚存先生遣戍伊犁日記書後

荷戈不礙鳳鸞身在地冰霜在抱春老柳如門
松似幄塞山一路迂詩人

翰林言事愚忠在諫草於今可不存戒酒戒詩
天語切愛公何止 賜環恩

簷前二首

簷前稚燕一巢安露頂涼蓬風日乾後院雜花
開未報却從獠婢鬢邊看

櫻桃熟後欲開觴
融到冰飴艾酒香
鮮筍乍來清化鎮
亟將籩豆付廚娘

孫公和象

蘇門山色還如昨
嘯譜人間已失傳
但有山頭漢時月
不知魏晉種花年

一絃琴勝七絃鳴
元默無言似不情
羞煞當年嵇阮輩
下山始聽碧虛聲

冷坐

冷坐思閒步闌干
幾曲紅摘花黏袖
雨招燕貼

言前言卷之二
一五
簾風院窄陰初滿池寬水未充百泉申近約心
已太行東

入觀北行渡柳園口

心閒交印後身健曉行初六月聞 俞旨三年
走使車長河波正穩高館暑全祛此去承 天
語多應慰倚閭

延津

繞出沙岡一逕斜疎疎籬落幾人家掠輿風起
高粱地荷鍾雲歸大麥車野性能馴惟水鳥芳

名不識是山花此間合問溝渠利漫使梁亭灌
楚瓜

自衛輝繞道遊百泉

亘北烏雲是太行遊山得雨助新涼出郊便覺

雙眸朗直抵山彪

地名

綠繞莊

上嶺籃輿步步輕潞王園寢盡荒荆斷雲一片
將疎雨掠過輿前又放晴

三里蘇門溼霧封入林已聽水琤琮山容鬱鬱
凌清漢若論丹青近北宗

白露洲前水似珪
十三古柏種來齊
涼雲抱住清暉閣
月夜應招老鳳棲

碎錦離離傍岸花
花間叢竹亞闌遮
瓶笙攜向魚磯上
試過卽茶更洱茶

串串珍珠水折迴
水晶世界水晶杯
鱖魚突過西湖鯉
道向牛郎橋下來

下釣人歸舊路經
上鉦時候水冥冥
凡閒那有蘇門嘯
借笛僧房隔水聽

公和仙去夏峯尊
問到山名合姓孫
七載蘇門

方踐約輸君苔石是重溫

謂何古心再遊

樹杪懸鐙代月輪山中一宿亦前因年來禱雨
常靈應齋祓明朝拜衛神

滹沱

黃河北渡又漳河繞道泉源逸興多長夏連陰
真不易一天涼雨過滹沱

正定大佛寺

正定府中大佛寺創自開皇之六年金身七丈
有三尺三層飛閣蒙其顛踵隋禮佛宋乾德不

惜國帑億萬千金錢鑄成莊嚴南海相四十二
臂兀立蓮臺蓮 京師天寧接引佛托鉢如捧
銅盤仙持共此佛絜長短不及三分之一焉又
如杭州西湖大石佛佛面雖大僅及肩土人已
作驚世語謂佛耳內可張筵何如此佛全身現
瓔珞兵燹不到旃檀前昔 朝御筆屢頒賜光
明夜夜騰奎躔恒山背負作北鎮佛力廣大真
無邊吾爲近畿吟雨默叩禱是日楊枝灑潤風
飄然牀牀徹夜客無寐得非取自菩薩泉

田光墓和古心韻

愧煞知人太子丹
忿忿一死得賢難
赤心直掣夷門劍
怒髮徒衝壯士冠
薦友有成身不惜
報恩無語骨常寒
蕭蕭易水亡燕恨
忍見清波濺客鞍

賈島祭詩處在定興縣和古心韻

畏友昌黎在何嘗
不驚名神勞安用補
思絕每逢生退筆
嗤僧塚傳書抵晏楹
寒風吹佛院落葉
更無情

西嶼

西嶼人家背夕曛馬蹏聲起踏沙聞賣瓜邨外
堆黃雪揚米邨中散白雲

題麟兒亭河帥半畝園爲李笠翁舊址

天然小築在城闌猿鳥騰歡赤鳥還舊蹟留題
仍半畝恩光入望有三山雲霞霽景藤蘿外
絲竹清音水石間自昔風流容嘯傲惜公能得
幾時閒

黃塵九陌拂鞭行一入松關眼忽明欹笠肯爲

前徑導倚闌應待好詩成洞天品貴奇峯出阿
閣巢深小鳳鳴白髮江南老賓客梅花題字亦
多情

公有碑記錢樸
溪翁題識在後

贈斌笠畊通政時招同陳偉堂少宰陳子
崔廷尉觴雨於積水潭古寺

廿年詩友鬢多蒼相見城南喜欲狂話雨不知
三伏暑坐花真有萬荷香京朝休沐清涼界文
史通才政事堂好作放翁團扇畫一縑留與寺
僧藏

癸卯六月十九日至二十三日五次召

見勤政殿謹紀

覲光前席拜

恩稠

奏對移時

上指中土瘡

瘡

問最周到底讀書蒙

獎予

上告樞臣有

人之多慙入告乏嘉猷仙班門右隨金馬

侍班在京逸事河壩

鐵牛奏及于忠肅公製

事往歲防城危險際

天神能解

聖人憂問

往歲防城始末其危險在七月望後至

二十日化險為平全賴天神默佑
得家書池荷盛開密齋三弟喜而作詩輒

用其韻

墨池萬葉碧雲浮聽說今年花更稠
羣從尙邀詩客賞比鄰時爲藥材收
涼陰一櫂過橋泊鄉夢雙溪遶屋流
官舍但留擎雨蓋北歸話雨已清秋

麟見亭先生屬作放鼉歌

神物銜恩脫機陷甘守池中聽經梵
此身會能致雲霧長駕無梁千佛懺
網鼉來自袁江濬漁師不殺畏爾神
獻之公門裳甲動將歸大壑公

之仁攜赴金山復象山江波東流鼉復還昂頭
屢向老僧顧功德水中是生路景純鼉精世所
傳焦山窟宅金山墓鼉乎鼉乎爾何用大帥捐
金作鼉俸噫吁嘻韓公驅鱷公放鼉其事雖異
理則那焦山好事何其多曩者定陶漢鼎阮公
置更有諸葛銅鼓張公搥阮芸臺相國張芥航
河帥先後置定陶鼎
暨諸葛銅鼓
于焦山寺中放生喜舍一而二鼉也幸免菩薩
訶僧言山海慧自在饒益我故投山阿龜毛兔
角易斷滅還爾一勺世界真婆娑

史叔平院長拳石山房

龍亭本是周王府下有奇峯沒塵土一朝撥翳
見天日嵌空玲瓏青可數鍾泉太守官爲家輦
以五馬來官衙樓鸞日冠二峯名有奇態已見窗

戶生烟霞君也移石入講院磊落如環衆英彥

秋風鱗甲石鯨動一登龍門此開宴鴛湖丈人

錢心壺爲作詩一石一篇詠歎之老梧金井導

源活時聽泉響通曲池池上有亭翼然起六角
懸鐙映秋水登高重九客來過亂插黃花君色

喜君之文章當跨黿君之氣概欲射濤手羅衆
星皆帖伏千百夫長無此豪我亦徘徊得嘉石
照影池頭常岸幘石交今者能幾人錢史鄒張
共晨夕

夢中得句題畫蘭

款款風來昔昔香水雲疊疊想衣裳何時拋却
離騷卷迎著湘君笑一場

六十生朝自述

甲辰正月十四日

懸弧冠帶戒晨興雙鬢初華馬齒增迎養頻年

獻祿將觀 光五日戀觚棱昨歲以豫泉三年期滿陞見召對

次繡巖紅岫銜 恩舊先世蒙高廟賜額繡巖紅岫玉葉天

漿紀夢曾少時夢三百歲僧餉天漿碧玉葉周甲山妻先半月

堂前同翦上元鐙

烏府題名字一新近輯泉使題名每於讀律景前人氣

銷鄰境雞豚樂吏退公堂鳥雀馴釀酒壘清無

取烈安花窖暖使知春白雲亭上尙書履曾述

家聲到 紫宸上垂問家世以先文敏公會任大司寇爲對

齋居何異下帷年圖史隨身岸上船薄學常辜

先輩望小詩未要世人傳偶從習射通書法却
爲譚山結畫緣安得萬千間廣厦庇寒不擾杜
陵眠

及門雙第話閩溪

謂林殿撰鴻年何編修冠英同科及第京朝賀詩成帙阮

芸臺和國題門

下門生

越晉齊

浙江山東山西先後四科得小

門生二

百餘人顧我何能量玉尺得人多半上丹梯梁

園字亦停車問嘉石詩還授簡題更有足徵文

獻者蘇楊二子具靈犀

謂蘇源生楊淮二生分輯中州詩文鈔

菱絲牽夢到江鄉歌笠何年上釣航別墅新添

松桷影

新葺橫雲山先公祠宇

春池小繼苜盤香

先君兩在太倉

無爲州學正今三弟密齋亦以校官注選

奇緣六逸歸雲早

昨歲得柳東六

逸圖有香光書跋

勝景三峯抱水長

橫雲山莊在小崑山小赤壁之間

近想綠卿岑對好寄書補竹向山莊

半世朋交鬢雪多勉同寮案養天和京朝遠寄

蟠桃賦

許演生同年贈汪退谷書蟠桃賦

水驛應傳瓠子歌

車中

次合龍

已斷洪流歸澤鴈將回元氣熟田禾宵

來鏡聽啞兒女吉語當簷噪鵲過

外曾孫翁之廉重校